

GÁLATAS

San Pablopa K'art'a P'ãda Galacia

Eujãdepema Ijãapataarãmaa

San Pablo, Jesucristopa jirit'eradapa na k'art'a p'ãji. Na k'art'ade Pablopa k'irãpapi bi Galacia eujãdepema ijãapataarãmaa, ichiata ãchi t'ãide naapiara jaratee nipapachi Jesucristopa ooda ãchi o k'achiadeepa k'aripa atait'ee. P'anau bi judiorã, chi mama jarateepataarãpa Cristode ijãapataarã tauchaa bipidaipia bi ãchi imik'ĩraarã k'ap'iade maa-e pirã atuadait'ee. Pablopa jĩp'a jara bi eperãarã it'aa wãdait'ee wãara Cristode ijãapata perãpai.

Salude jarap'eda, naapiara Pablopa ma Galacia eujãdepema ijãapataarã itria bi Cristodepai ijãadai k'ãyaara, awara ijãa k'inia p'anadairã (cap. 1.1-10). Jara bi wãara ichi Jesucristopa jirit'erada mãik'aapa pëida ichi ũraa jarateede; awaraa Cristopa jirit'eradaarã Jerusalende p'anĩrãpa irua jarateepata pia ak'ipata (caps. 1.11-2.21); sãap'eda Cristodepai ijãapataadaipia bi mãik'aapa sãap'eda jiridaik'araa bi oodait'ee Moisepa p'ãdade jara bik'a, Ak'õrepa ãra pia ak'imerã (caps. 3.1-4.31). ũraa bi jĩp'a oopataadamerã Cristopa oopi bik'a mãik'aapa chik'inia p'anapataadamerã (caps. 5.1-6.10). T'ëepai jara bi Tachi Ak'õrepa eperãarã pia ak'i-e, ãchi k'ap'iade tauchaa iru p'anadairã maa-e pirã wëe p'anadairã. Jĩp'a pia ak'ipari t'ãri chiwidi pik'a p'anadak'ãri Jesucristode ijãapata k'aurepa (cap. 6.11-18).

Salude pëida

¹ Mi, Pablopa na k'art'a p'ãru parã Galacia eujãdepema Cristode ijãapataarãmaa. Eperãarãpa mi jirit'erada-e paji. Ichiaba mi pëida-e paji. Tachi Ak'õre, Cristo chok'ai p'irabaipidapata mi jirit'eraji mãik'aapa Cristopa mi pëiji. ² Jõma tachi ipemaarã Cristo k'aurepa nama mi ome auk'a p'aniirãpa salude pëiruta parã Cristode ijãapataarã it'aa t'ipata chaa. ³ Taipa it'aa iidipata Tachi Ak'õre Tachi Waibia Jesucristo ome parã pia ak'i p'anadamerã. Mãgá k'ãiwee p'anapataadait'ee. ⁴ Tachi Ak'õrepa k'isia iru badak'a Cristo piuji tachia p'ek'au k'achia oopata k'aurepa. Ichi ita-aria peepiji tachi k'aripa atait'ee na p'ek'au eujãdepemaarãpa k'achia oopatadeepa. ⁵ Maperã ichita it'aa t'idãma Tachi Ak'õremaa jaradait'ee iru jõmaarã k'ãyaara t'ãri piara bapari. Amén.

K'irak'aupai ijãadai awaraarãpa jaratee p'ani

⁶ Mamida mi p'era pik'a bi taarã-e weda parãpa ijãa amaadaruta perã Tachi Ak'õrepa k'isia iru badade ooit'ee Cristo k'ap'ia pari. Iru k'ap'ia pari Tachi Ak'õrepa parã chupiria k'awaaji mãik'aapa jiriji irude ijãadamerã mãik'aapa it'aa wãdamerã. Mamida parãpa mãga ijãa k'iniada-e p'ani. Ma k'ãyaara ijãa k'inia p'ani awaraa ne-inaa k'aurepa it'aa wãdai. ⁷ Mamida mãga-e! Eperãarã ùk'uruurãpa parãmaa k'isia awara-awaraapiruta. Mãirãpa ne-inaa awara jaratee k'inia p'ani, Tachi Ak'õre pedee pia jarateedai k'ãyaara. ⁸ Mapa taipa wa it'aripema angeleerãpa paara jarateeruta pijida taipa naaweda jarateeda awara, Tachi Ak'õrepa mãirã atuapiipia bi. ⁹ Parãpa ijãajida taipa

naaweda jarateedap'edaa. Mapa mia waya jarai ma et'ewa jarada. Abaapa jarateeru pirã taipa Cristode jarateeda k'ãyaara awara, mǎgí atuaipia bi.

¹⁰ Mia jara k'inia-e bi eperãarãpa mi pia ak'idamerã mia jaratee bi k'aurepa. Mǎga ooda paara, p'oyaa oo-e pak'aji Cristopa oopi bik'a. Cristode ijãai naaweda, mǎga ooji mĩda, írã jĩp'a na mimia oo k'inia bi Tachi Ak'õrepa oopi bik'a, iruata mi pia ak'imerã.

Tachi Ak'õrepa Pablo jirit'erada Jesupa ooda jarateemerã

¹¹ Ipemaarã Cristo k'aurepa, mia nǎga k'awapi k'inia bi parãmaa. Mia Cristopa ooda eperãarã k'aripait'ee parã t'ãide jaratee nipak'ãri, jaratee-e paji mĩchi k'ĩsiadoopa ¹² maa-e pirã awaraapa mimaa jarateeda. Jara-e paji eperãpa jara pẽida. Jĩp'a jaraji Jesucristopa mimaa k'awapida.

¹³ Parãpa k'awa p'ani mia ooda at'ãri judiorãpa ijãapatade ijãa bak'ãri. Tachi Ak'õredeerã audú jiri nipapachi peeit'ee, mǎirã jõpi k'inia bada perã.

¹⁴ Maapai judiorãpa ijãapata audupiara k'awaa wãji, mi ome año auk'a iru p'anadap'edaarã k'ãyaara. Jõmaarã k'ãyaara pipiara oo k'inia baji judiorãpa oopata, chonaarãweda ũraapatap'edaak'a.

¹⁵ Mǎga baji mĩda, írã mia k'awa bi Tachi Ak'õrepa k'ĩsia iru baji mi jirit'erait'ee oomerã ichia oopi bik'a. Mǎga ooji mi t'oi naaweda, ichi wãara t'ãri pia bapari perã. ¹⁶ Maperã ichi Warra k'awapiji mimaa, judio-eerã t'ãide mia jarateenamerã ichi Warrapa ooda eperãarã k'aripait'ee. Mamĩda mǎga k'awapik'ãri, mi apidaamaa wã-e paji ũraa iidide.

¹⁷ Ichiaba wã-e paji Jerusalendee Cristo ome ni-papatap'edaarãmaa ne-inaa iidide, Cristopa ãra mi naa pëiji mĩda jarateede. Ma k'ãyaara, ma t'ëepai wãji Arabia eujãdee it'aa t'ĩde michi ituaba. Maap'eda waya cheji Damasco p'uurudee.

¹⁸ Wãara, Cristode ijãadak'ãriipa año õpee paru-maa, mi Jerusalendee wãji Pedro ak'ide mãik'aapa tomia omé mama beeji. ¹⁹ Mamĩda mama bide Cristopa jirit'eradaarã awara unu-e paji. Tachi Waibia Jesucristo ïpema, Santiago aupaita unuji. ²⁰ Tachi Ak'õrepa k'awa bi mia na p'ã bide seewa jara-e bi. Wãarata jara bi.

²¹ Ma t'ëepai Jerusalandeepa wãji Siria eujãdee mãik'aapa Cilicia eujãdee. ²² Maapai Cristode ijãapataarã Judea eujãdepemaarãpa mi waide k'awada-e p'anajida. ²³ Aba na pedee ùrijida awaraarã ijãapataarã it'aideepa: “Tachi jiri nipadapa ïrá jarateemaa bi Cristopa ooda eperãarã k'aripait'ee, naaweda irude ijãa amaapi k'inia baji mĩda.” ²⁴ Mãga ùridak'ãri, ma ijãapataarã o-ĩa it'aa t'ĩjida gracias jaradait'ee Tachi Ak'õremaa mi pari.

2

Ak'õrepa jirit'eradaarã awaraarãpa Pablo pia ak'ipatap'edaa

¹ Ma naa wãda t'ëepai Jerusalendee, catorce años parumaa waya wãji tachi ïpema Cristo k'aurepa Bernabé ome. Mia tachi ïpema Tito auk'a ateeji. ² Wãji Tachi Ak'õrepa mimaa k'awapida perã wãipia bi. Mama bide ijãapataarã ak'ipataarã taide mia jaraji pedee pia jõma mia Cristode jarateepari

judio-eerã t'ãide nipak'ãri. Mãga ooji k'awa k'inia bada perã ãrapa pia ak'idai wa pia ak'ida-e pai mia jarateepari judio-eerãmaa. Mãga k'awa k'inia baji pariatua na mimia oo k'inia-e bada perã. ³ K'ĩsia nĩbaji mĩda ãrapa jaradait'ee, mãga uchiae paji. Mi k'õp'ãyo, Tito, judio-ee paji mĩda, maarepida jarada-e paji ichi k'ap'iade tauchaa bipimerã. ⁴ Ma-it'eeta wãjida ãramaa iidide. Ûk'uru wãara Cristode ijãada-e p'anadap'edaarã mera t'ĩujida judio-eerã ijãapataarã t'ãide, tachi ijãapata Cristode pia k'awaade. Jarajida tauchaa bipidaipia bi judio-eerã ijãapataarã imik'ĩraarã k'ap'iade. Mãgeerãpa k'iniada-e tachi ijãadamerã Jesucristodepai, Tachi Ak'õrepa tachi pia ak'imerã. Tachi auk'a esclavoorãk'a p'anapi k'inia p'ani Moisepa p'ãda jua ek'ari, judiorã chonaarãweda p'anapatap'edaak'a. ⁵ Taipa maarepida k'ĩsiada-e paji oodait'ee mãgeerãpa oopi k'inia p'anadap'edaak'a. Cristopa ooda eperãarã k'aripait'ee, ma pedee wãara jĩa k'inia p'anajida parã-it'ee.

⁶ Ma awara tachi waibiarãda apataarãpa ne-inaa awara jarada-e paji mia jarateemerã. Mia jara bi "tachi ijãapataarã waibiarãda apata" Ûk'uruurãpa at'ãri jarapata perã Cristo ome nipapatap'edaarã awaraa ijãapataarã k'ãyaara waibiara p'ani. Mamĩda mia p'ua-e bi chisãgĩ ijãapari waibiara bi mãik'aapa chisãgĩ ijãapari ek'ariara bi. Tachi Ak'õrepa ichideerã jõmaweda auk'a pia ak'ipari. ⁷⁻⁸ Mãgĩ ijãapataarã waibiarãpa ne-inaa awara jarateepidai k'ãyaara mimaa, mi bijida Tachi Ak'õre juade waapiara judio-eerã

t'ãide jarateenamerã Cristopa ooda eperãarã k'aripait'ee. K'awajida Tachi Ak'õrepa mi ma-it'ee jirit'eraji, Pedro jirit'eradak'a judiorãmaa jarateenamerã.

⁹ K'awaadak'ãri Tachi Ak'õrepa wãara mi k'aripa bi judio-eerãmaa jarateenamerã, Santiago, Pedro Juan ome, chi ijãapataarã ak'ipataarã waibiarãda apata, ãchi jua teejida mĩmaa mãik'aapa Bernabemaa. Mãga oojida ak'ipidait'ee auk'a k'õp'ãyoorãk'a taipa Cristopa ooda eperãarã k'aripait'ee judio-eerã t'ãide jarateedaipia bi. Jõdee ãchia judiorã t'ãide jarateedai. ¹⁰ Jĩp'a ãchia taimaa iidijida k'ĩra atuanaadamerã k'aripadait'ee chupiria chedeerã ãchi t'ãide. Mia pida auk'a mãga oo k'inia bi.

Antioquía p'uurude Pablopa Pedro itriada

¹¹ Mágá ãra t'ãideepa t'ãri o-ĩa uchijida mĩda, Pedro Antioquía p'uurudee chek'ãri, ijãapataarã taide mia iru itriaji judio-eerãmaa ne-inaa k'achia oo bada perã. ¹² Nãga ooji. Naa pachek'ãri, iru auk'a nek'opachi judio-eerã ijãapataarã ome. Mamĩda ai t'ẽepai ũk'uru judiorã Santiago ome p'anadap'edaarã Jerusalendeepa pachejida. Mãirãpa ijãapata judiorã nek'odaik'araa bi judio-eerã ome. Ma awara ijãapata tauchaa bipidaipia bi judio-eerã k'ap'ĩade. Maperã awara nek'ojida. Pedropa mãga unuk'ãri, auk'a awara nek'omaa beeji, mãirãpa k'achia pedenaadamerã iru ãpite. ¹³ Mãpai Pedropa mãga ooruu unudak'ãri, awaraa judiorã ijãapataarã Antioquiadepemaarã auk'a k'ĩra jĩp'a-eedachida. Judio-eerã p'anadap'edaamãipa awara nek'ojida, Bernabé paara. ¹⁴ Mia ãchi mãga unuk'ãri, k'awaaji

ãchia ooda-e paji Tachi Ak'õrepa wãarata jara pëidak'a. Mapa jõmaarã ijãapataarã taide Pedromaa jaraji:

—Piichi t'oru weda pi judío mĩda, nama bide judiorãk'a ba-e pajida aji. Mãga bita, ¿sãap'eda pia judiorãpa oopata oopi k'inia bima aji, judio-eerãmaa?

Cristode ijãa p'anipapai it'aa wãdai

¹⁵ Wãara, tachi t'oru weda tai judiorãpa iru p'anapachida Tachi Ak'õrepa Moisemaa ũraa p'ãpida. Tai Tachi Ak'õrede ijãadak'aa beerã-e, judio-eerãk'a. ¹⁶ Mamĩda Tachi Ak'õre Ũraa p'ãda mágá iru p'ani mĩda, taipa pida k'awa p'ani eperã apida p'ek'au k'achia wêe bait'ee Tachi Ak'õre k'ĩrapite mágipa oopari perã ma ũraa p'ãdade jara bik'a. Moisepa p'ãdade jara bik'a oo p'anipapai eperãarã p'oyaa wãdak'aa Tachi Ak'õre truadee. Jip'a eperã iru truadee wãit'ee Jesucristode ijãapari perã. Maperãpi tai auk'a Cristode ijãajida, iru k'aurepa Tachi Ak'õrepa tai p'ek'au k'achia wêe ak'imerã.

¹⁷ Mágá Cristode ijãajida, p'ek'au k'achia wêe p'ana k'inia p'anadap'edaa perã Tachi Ak'õre k'ĩrapite. Uchiajida ma ũraa p'ãdade jara bi jua ek'ariipa mãik'aapa judio-eerãk'a pajida. Mãga oodak'ãri, ¿ne-inaa k'achia oojidak'ã? Mágá ne-inaa k'achia ooda paara, mágara Cristopa taimaa ne-inaa k'achia oopik'aji. ¡Mamĩda mágá-e! ¹⁸ Michi k'inia wãara ne-inaa k'achia ook'aji eperãarãmaa waya oopida paara Moisepa p'ãdade jara bik'a, oopii k'ãyaara Tachi Ak'õrepa jara pëidak'a Cristo k'ap'ia pari. ¹⁹ Mia mágá jara bi mia p'oyaa oo-e

pada perã jõma ma p'ãdade jara bik'a. Ma k'aurepa mi piudak'a baji, ne-inaa oo-ee Tachi Ak'õre-it'ee. Mamãda Cristode ijãak'ãri, irua mi uchiapiji ma p'ãdade jara bi jua ek'ariipa, wãara oomerã Tachi Ak'õrepa oopi k'inia bik'a. ²⁰ Cristopa mãga ooji, kususode piuk'ãri. Maperã mia jarai mi jida auk'a kususode piu pik'aji Cristo ome, mãgã uchiait'ee ma ũraa p'ãda jua ek'ariipa mãik'aapa araa bapariit'ee iru ome. Írá iruta bapari mi ome mãik'aapa iru mi poro waibia. Mapa mi chok'ai bi misa, ijãa bi Tachi Ak'õre Warrade mãik'aapa oo k'inia bi irua oopi bik'a. Mãga oo k'inia bi irua mi audú k'inia iru bap'eda, piuda perã mi pari. ²¹ Mia eperãarãmaa ijãapi k'inia-e bi ne-inaa awara, Tachi Ak'õrepa pedee pia Cristode jara pëida k'ãyaara. Cristo piuji tachi o k'achiadeepa k'ariipa atait'ee, mãgã Tachi Ak'õrepa tachi pia ak'imerã. Tachi Ak'õrepa eperãarã pia ak'ida paara oo p'anadap'edaa perã Moisepa p'ãdade jara bik'a, Cristo pari piuk'aji.

3

Chisãgide ijãadaipia bi; Moisepa p'ãdade wa Cristode

¹ ¡Aai, Galacia pidaarã! ¡Parã k'ĩsia k'awada-ee beerãk'api p'ani! ¿Apidaapa parã poro p'ërebaipit'aajida-ek'ã? ¿K'irãpada-e p'anik'ã taipa jarateedap'edaa parã t'ãide nipadak'ãri? Jesucristo kususode piuda pia jarateejida parã jõmaarãmaa. ² Jĩp'a mia nãga k'awa k'inia bi. ¿Tachi Ak'õre Jaure ba chejik'ã parã ome, oo p'anadap'edaa perã Moisepa p'ãdade jara bik'a maa-e pirã ijãadap'edaa perã Tachi Ak'õrepa jara pëida Cristo k'ap'ia pari? ³ ¿Parã wãara

k'ĩsia k'awada-ee p'anik'ã? Naaweda Cristopa ooda eperãarã k'aripait'ee ũridak'ãri, Cristodepai ijãajida m̃aik'aapa p'aneejida iru Jaure ome. Ĵĩrá k'ĩsiapatak'ã Tachi Ak'õrepa parã pipiara ak'iit'ee oo p'ani pirã judiorã ũraa p'ãdade jara bik'a maa-e pirã ne-inaa oo p'ani pirã pãchi juadoopa? ⁴ Ĵõma Tachi Ak'õre Jaurepa pia ooda parã-it'ee pari oojik'ã? Ĵwãara m̃aga pari ook'aji, parã ijãa k'inia p'ani pirã ma ũraa p'ãdade, Cristodepai ijãadai k'ãyaara! ⁵ Mia waya iidiit'ee. Tachi Ak'õrepa ichi Jaure p̃eik'ãri parã ome bapariimerã m̃aik'aapa parã t'ãide ne-inaa oopimerã eperãarãpa p'oyaa oodak'aa ãchi juadoopa, Ĵsãap'eda m̃agá p̃eiparima? P̃ei-e parãpa oopata perã irua Moisemaa ũraa p'ãpida jara bik'a. Ma k'ãyaara p̃eipari Cristodepai ijãapata perã.

*Tachi Ak'õrepa Abraham pia ak'ida
(Ro 4.1-3)*

⁶ K'ĩsiadáma judiorã chonaarãwedapema Abrahamde. Tachi Ak'õrepa ũraa p'ãpidade chonaarãmaa jara bi:

‘Abrahampa Tachi Ak'õrepa jarada ijãaji. Maperã Tachi Ak'õrepa iru pia ak'ipachi.’ *(Gn 15.6)*

⁷ Mapa k'awaadaipia bi eperãarãpa Tachi Ak'õrede ijãadak'ãri, ãchi wãara Abrahamdepa uchiadak'a p'ani. Iruk'a Tachi Ak'õrepa jarada ijãapata m̃aik'aapa iru k'ĩrapite pia p'anapata. ⁸ Tachi Ak'õrepa naaweda k'ĩsia iru bajĩ judio-eerã o k'achiadeepa k'aripa atait'ee, wãara ijãadak'ãri. M̃aga k'awapiji Abrahammaa. Tachia m̃aga k'awa p'ani Tachi Ak'õrepa Moisemaa nãga p'ãpida perã:

‘Tachi Ak’õrepa na pedee pia Abrahammaa mǎgaji:
 “Mia na p’ek’au eujǎdepemaarǎ jǔmaweda
 k’aripait’eeda aji, pi k’ap’ia pari.” ’ (Gn
 12.3)

⁹ Ak’õrepa mǎga jarada perǎ, tachia k’awa p’ani
 Tachi Ak’õrepa Abraham bendiciadak’a irua
 ijǎada perǎ, awaraarǎ auk’a bendiciait’ee irude
 ijǎadak’ǎri.

¹⁰ Jǔdee eperǎarǎ k’achia ooit’ee, ichi ũraa p’ǎdade
 jara bik’a ooruta pirǎ irua ǎchi pia ak’imerǎ. ǎchi
 atuapiit’ee p’oyaa ooda-e perǎ jǔma ma ũraade jara
 bik’a:

‘Eperǎpa oo-e bi pirǎ jǔma Ak’õre Ũraa p’ǎdade jara
 bik’a, atuait’ee.’ (Dt 27.26)

¹¹ Ma jǔma jara aupadade k’ĩsiadak’ǎri, pia k’awa
 p’ani Tachi Ak’õrepa pia ak’i-e chi oo k’inia bipapai
 iru ũraa p’ǎdade jara bik’a. Jĩp’a pia ak’ipari eperǎ
 irude ijǎa bita. ¿Iru ũraa p’ǎdade nǎga jara bi-ek’ǎ?

‘Eperǎ Tachi Ak’õrede wǎara ijǎapari ichita ba-
 pariit’ee iru ome, p’ek’au k’achia wǐe bairǎ
 iru k’ĩrapite.’ (Hab 2.4)

¹² Eperǎ ijǎa-e bipa ooda paara jǔma Tachi Ak’õre
 Ũraa p’ǎdade jara bik’a, it’aa wǎk’aji ichi k’ĩradoopa.
 Mǎga k’awa p’ani Tachi Ak’õre Ũraa p’ǎdade jara
 bairǎ:

‘Eperǎpa ook’ǎri jǔmaweda Ak’õre Ũraade jara bik’a,
 ichita bapariit’ee ma ũraade jara bik’a.’ (Lv
 18.5)

¹³ Mamĩda tai judiorǎpa oodak’aa jǔmaweda Tachi
 Ak’õre Ũraa p’ǎdade jara bik’a. Mapa o k’achiade
 p’anajida mǎik’aapa atuadait’ee paji. Mamĩda
 Cristopa tai uchiapiji ma ũraa p’ǎdade jara bi jua
 ek’ariipa, ma k’aurepa atuanaadamerǎ. Mǎga ooji

kurusode piuk'ãri. Tachi Ak'õrepa iru k'achia ooji, tai k'achia ooi k'ãyaara. Mãgá tai k'aripaji. K'awa p'ani Cristo k'achiade baji Ak'õre Ñraa p'ãdade jara bairã:

‘Eperã pak'urude baijira bi k'achiade banait'ee.’

(Dt 21.23)

¹⁴ Jesucristopa mãgá tai k'aripaji parã judio-eerã paara ijãadamerã Abrahampa ijãadak'a. Ma awara mãgá tai k'aripaji tachi jômaweda ichiaba ijãadak'ãri, iru Jaure tachi ome iru p'anadamerã. Mãgá Tachi Ak'õrepa ooji ichia jaradak'a Abrahammaa, jarak'ãri Abraham k'ap'ia pari ne-inaa pia ooit'ee na p'ek'au eujãdepemaarã jõmaarãmaa.

Moisepa p'ãda Tachi Ak'õrepa jarada ome

¹⁵ Ipemaarã, k'ĩsiadáma eperãarãpa oopatade. Eperãpa p'ãk'ãri k'airãpa ichi net'aa atadait'ee ichi piuk'ãri, chi firma p'ãp'eda, eperã awaraapa ne-inaa awaraa p'ã-e pai ai p'ãdade, chi p'ãda chiparipa jara-ee. Maa-e pirã chipari piuk'ãri, awaraa eperãpa ne-inaa awaraa p'ã-e pai ai p'ãdade. Ichiaba ichi k'inia ma p'ãda jõpi-e pai.

¹⁶ Tachi Ak'õrepa jara bëiji Abraham ome irudeepa uchiadait'eerã k'aurepa na p'ek'au eujãdepema jõmaarãmaa ne-inaa pia ooit'ee. Mãga jarak'ãri, jara k'inia-e baji jômaweda Abrahamdeepa uchiadait'eerã k'ap'ia pari ma ne-inaa pia ooit'ee. Jip'a jara k'inia baji irudeepa uchiait'ee abaa k'ap'ia pari mãga ooit'ee. Mãgí Jesucristo. ¹⁷ Ma jara aupadade mia nãga jara k'inia bi: eperãpa p'ãda bëiparik'a k'awaadamerã k'aipa ichi net'aa atait'ee, mãga pik'a Tachi Ak'õrepa ichia jarada bëiji Abraham ome, iru t'ëe uchiadap'edaarãpa

auk'a mǎga k'awaadamerǎ. Jǒdee, cuatrocientos treinta años wǎyaada t'ēepai, ichi ũraa Moisemaa p'āpiji. Mamǐda ma ũraa p'āpik'āri, ichia jara bēida Abraham ome at'āri beeji. Ma ũraa p'ādapa jōpi-e paji ichia naapiara jarada Abrahammaa. ¹⁸ Tachi Ak'ōrepa na p'ek'au eujādepemaarǎ k'aripa k'inia bada paara Moisepa ũraa p'ādade jara bik'a oopata k'aurepa, mǎgara ichia jarada jara bēi-e pak'aji Abraham ome. Mamǐda mǎga-e paji. Ichia jarada bēiji Abraham ome, k'inia bada perǎ Abrahampa ma jarada ijāamerǎ. Ma ijāada k'aurepa na p'ek'au eujādepemaarǎ auk'a ijāadak'āri, pia p'anapataadai Ak'ōre k'īrapite.

K'āare-it'ee Moisemaa ma ũraa p'āpida

¹⁹ ¿K'āare-it'ee ichi ũraa Moisemaa p'āpijima? Mǎga p'āpiji eperāarǎpa k'awaadamerǎ āchi p'ek'au k'achia ooyaa p'anapata iru k'īrapite. Ma ũraa pēiji ichi angeleerǎ ome eperāmaa, mǎgipa p'āmerǎ eperāarǎ-it'ee. Tachi Ak'ōrepa k'īsia iru baji eperāarǎpa ma ũraa p'āda iru p'anadamerǎ, ma Abrahamdeepa uchiada na eujādee cheru misa na eujādepemaarǎ k'aripait'ee, Ak'ōrepa naaweda jaradak'a. ²⁰ Mǎgá tee pēiji mǐda ichi ũraa Moisés k'ap'ia pari, mǎga oo-e paji jarak'āri Abrahammaa. Ichi it'aideepa jaraji ichia ooit'ee bada Abrahamdeepa uchiada k'ap'ia pari.

²¹ Maperǎ eperǎpa k'īsiai Tachi Ak'ōrepa k'īsia awara-awaraa iru baji eperāarǎ o k'achiadeepa k'aripa atait'ee. ¡Mamǐda mǎga-e! Ichi ũraa tee pēidapa eperāarǎ o k'achiadeepa uchiapida paara, wǎara p'ek'au k'achia wēe p'anak'ajida iru k'īrapite mǎik'aapa it'aa wǎk'ajida ma ũraa

k'aurepa. ²² Mamĩda iru ũraa p'ãdade jara bi eperãarã jõmaweda p'ek'au k'achia jua ek'ari p'anapata. Ara presoorã p'oyaa uchiada-e p'anik'a carceldeepa ãchi juadoopa, mãga pik'a eperãarã p'oyaa uchiada-e p'ek'au k'achia jua ek'ariipa ãchi juadoopa. Aba uchiadai Jesucristode ijãadak'ãri, iru k'ap'ia pari Tachi Ak'õrepa eperãarã k'aripapari perã, ichia jaradak'a Abrahammaa.

²³ Cristo chei naaweda, tai judiorã ichiaba pre-soorãk'a p'anapachida Moisepa p'ãdade jara bi jua ek'ari. Ma ũraa carcel jãaparik'a baji. Tai ak'i baji Tachi Ak'õrepa unupiru misa ichia Abrahammaa jaradak'a. ²⁴ Mimiaparipa warra ak'iparik'a, ma ũraa p'ãdapa tai ak'i pik'apachi Cristo cheru misa, tai jida irude ijãadamerã mãik'aapa p'ek'au k'achia wẽe p'anadamerã Ak'õre k'ĩrapite. ²⁵ Írá, Cristo cheda perã, mãgá irude ijãadak'ãri, tai waa p'anadak'aa Moisepa p'ãda jua ek'ari.

²⁶ Ma k'ãyaara pipiara, parã jõmaweda Tachi Ak'õre warrarã, Jesucristode ijãapata perã. Mãgá araa p'anapata Cristo ome. ²⁷ Jõmaweda araa p'anapataarã Cristo ome Tachi Ak'õre warrarã iruk'a. Ma-it'ee tachia poro choopipata; ak'ipidait'ee araa p'anapata Cristo ome. ²⁸ Mãgá Cristo ome p'anapata perã, Tachi Ak'õrepa tachi ichi warrarãk'a auk'a unupari. Mãga unupari judiorã mĩda, judio-eerã mĩda, esclavoorã mĩda, esclavo-eerã mĩda, imik'ĩraarã mĩda, wẽraarã mĩda. Jõmaweda auk'a p'ani iru k'ĩrapite Jesucristo ome araa p'anadak'ãri. ²⁹ Ma awara tachi Cristo ome araa p'anapataarã wãara Abrahamdeepa uchiadap'edaarã, Tachi Ak'õrepa jara pẽida ijãapata perã Abrahampa ijãadak'a. Maperã iru

p'anadait'ee jōma Tachi Ak'ōrepa k'ĩsia iru bi ichideerã-it'ee.

4

Tachi Ak'ōre warrarã

¹ Piara k'awaadait'ee mia jara k'inia bi, k'ĩsiati nãgide. Eperã piuk'ãri warra k'aipeepai iru bi, ma-ãri weda ma warrapa atak'aa chi ak'ōrepa net'aa atabëida. Awaraarã jua ek'ari chi ak'ōre esclavok'a bapari, net'aa mak'iaara wëe, chonaa paru misa. ² Māimisa chi ak'ipataarãpa nĩpata chi ak'ōrepa año jara bëida parumaa, ma net'aa teedai naaweda māk'aapa chi te chipari papii naaweda. ³ Māga pik'a tachi jida esclavoorāk'a p'anapachida, Cristo na eujādee chei naaweda Tachi Ak'ōrepa jara bëidak'a. Maapai chonaarāwedapema ũraa jua ek'ari p'anapachida māk'aapa k'ĩsia p'anapachida warrarāk'a. K'ĩsia p'anapachida tachia ne-inaa k'awa p'anipa maa-e pirã ma ũraa jara bik'a oo p'anipa it'aa wā dai. ⁴ Mamĩda Tachi Ak'ōrepa k'iniak'ãri, ichi Warra pëiji na p'ek'au eujādee judío wërapa t'omerã. Māgá chi Warra bapachi Tachi Ak'ōre Ũraa p'ādade jara bi jua ek'ari māk'aapa jōma oopachi ma ũraade jara bik'a. ⁵ Māga ooda perã ichia aupai tai judiorã uchiapii ma ũraa p'ādade jara bi jua ek'ariipa. Ma-it'eeta Tachi Ak'ōrepa ichi Warra pëiji; tai judiorã uchiapimerã ma ũraa jara bi jua ek'ariipa māk'aapa Tachi Ak'ōre warrarã papimerã iruk'a. ⁶ Tachi Cristode ijāapataarãpa k'awaadamerã tachi wāara iru warrarã, Tachi Ak'ōrepa pëiji ichi Warra Jaure tachi t'āride bapari-imerã. Māgí Jaurepa ichita Tachi Ak'ōremaa jara-pari: “Abbá, Mi Ak'ōre.” ⁷ Mapa parãpa k'awaadai

ĩrá esclavoorã-e. Ma k'ãyaara Tachi Ak'õre warrarã. Mãgá iru warrarã perã, iru p'anadait'ee jõma irua k'ĩsia iru bi ichideerã-it'ee.

Pablo ijãapataarã-it'ee k'ĩsia nĩbada

⁸ Naaweda parãpa Tachi Ak'õre waide k'awada-e p'ani weda, Tachi Ak'õre-ee beemaa it'aa t'ĩpachida mãik'aapa ma jua ek'ari p'anapachida esclavoorãk'a. ⁹ Mamĩda ĩrá parãpa Tachi Ak'õre k'awa p'ani; pia jarait'eera, Tachi Ak'õrepa parã k'awa bi. Mãga bita, ¿sãap'eda waya t'ĩu k'inia p'anima ma naawedapema ne-inaa vale-ee baibi jua ek'ari, waya esclavoorãk'a p'aneedait'ee?

¹⁰ Parãpa iapata ewari, atane mãik'aapa año, ĩpata ewate pak'ãri maa-e pirã fiesta ewate pak'ãri. ¿K'ĩsia p'anik'ã mãga oo p'anipa Tachi Ak'õrepa parã pipiara ak'it'ee apemaarã ijãapataarã k'ãyaara?

¹¹ Mi waawee bi, pari parã t'ãide jaratee nipaji jĩak'aapa.

¹² ĩpemaarã, mia parãmaa enenee nĩbi mik'a uchiadamerã Tachi Ak'õrepa ũraa Moisemaa p'ãpida jua ek'ariipa. Naaweda parã ma jua ek'ari p'anada-e paji. Mapa parã t'ãide nipak'ãri, mia ma ũraa jaratee-e paji. Mama pak'ãri, parãpa mi auteebaijida mãik'aapa pia ak'ijida. ¹³ Parãpa k'awa p'ani mi k'ayaa bada perã, ma naa wãyaa wãdade parã t'ãide, mama beeji jarateet'ee Cristopa ooda eperãarã k'aripait'ee. ¹⁴ Ma k'ayaa k'aurepa parãpa mi yiaraa iru p'anak'ajida, maa-e pirã mi ãpite pedee k'achia jarak'ajida. Mamĩda mãga ooda-e paji. Ma k'ãyaara mi pia auteebaijida, Jesucristo wa it'aripema ángel auteebaik'ajidak'a.

¹⁵ Maapai parã o-ĩa p'anajida. Mia k'awa bi parãpa

mi k'aripa k'iniapa pāchi tau paara ēek'ook'ajida
mi k'aripadait'ee. Mamīda írá māga p'ani-e.
¿Parā, sāgajidama? ¹⁶ Írá ¿mi k'íra unuamaa iru
p'aneeruta-ek'ā, mia wāarata jara bairā parāmaa?

¹⁷ Awaraa Ak'ōre Ūraa jarateepataarāda
apataarāpa ne-inaa awara ijāapi k'inia p'ani,
mia jaratee bi k'āyaara. Mapa parā t'āide t'āri
pia māik'aapa iwarraa pedee nipapata. K'inia
p'ani parāpa āchi ak'idamerā Cristode wāara
ijāapataarāk'a. Mamīda māga p'ani-e. Mia jaratee
bideepa parā āyaa atee k'inia p'ani āchi eere
t'īudamerā. ¹⁸ Mia māga jarak'āri, jara k'inia-e
k'achia bi awaraarā t'āri pia nipadamerā parā
t'āide mi wē-e pak'āri. Pia bi ne-inaa pia oo
k'iniadak'āri parā ome. ¹⁹ Michi warrarā, ara wēra
bi p'irapa mia nībik'a ichi warra t'orumaa, māga
pik'a mi k'ísia nībipa waya mia nībi parāpa wāara
oorutamaa Cristopa oopi k'inia bik'a. ²⁰ Naapai mi
parā ome bada paara, k'awa bak'aji k'āata jarait'ee
parāmaa. Wāara mia k'awa-e sāgapi ooit'ee.

Pablopa jarateeda Agarde māik'aapa Sarade

²¹ ¿Parā ūk'uruurāpa Moisepa p'ādade jara bi jua
ek'ari p'ana k'inia p'ani-ek'ā? ¿K'ísia p'ani-ek'ā ma
ūraa jua ek'ari p'anaruta pirā, Tachi Ak'ōrepa parā
piara ak'it'ee? ¿Parāpa wāara k'awa p'anik'ā ma
ūraade jara bi? ²² Nāga jara bi. Abrahampa warra
omé iru baji; aba chi wēra esclava Agarpa t'oda,
aba chi wēra Sarapa t'oda. ²³ Chi wēra esclava
Agar ome ma warra ooji eperā jīp'aapa warra
ooperik'a. Mamīda māga-e paji chi wēra Sarapa
warra t'oda ome. Naaweda Tachi Ak'ōrepa jaraji
Abrahampa warra ooit'ee chi wēra ome. Māgí

warra t'oji Ak'õrepa jaradak'a, Abraham chi wëra ome audú chonaa p'anajida mïda warra oodait'ee. Tachi Ak'õrepa k'aripaji mǎgí warra oodamerã. ²⁴ ¡K'ísíati nǎgide! Ma wëra chaa jara k'inia bi Tachi Ak'õrepa jara bëida aba. Irua jara bëida aba Sinaí eedepema paji, mama iru ũraa jarada perã Moisemaa, ichia ma ũraa p'ãmerã eperãarã-it'ee. Mǎga jarap'eda, eperãarã esclavoorāk'a p'aneejida ma ũraa jarada jua ek'ari. Mǎgí jara bëida jara k'inia bi Agar. ²⁵ Maperã Abraham wëra esclava Agar jara k'inia bi Sinaí ee, Arabia eujãde bi. Agardeepa uchiadap'edaarã ichik'a esclavoorã p'anapachida. Mǎga pik'a írá Jerusalén p'uurude p'aniirã esclavoorāk'a p'ani, Tachi Ak'õre Ũraa jarada Sinaí eede, ma jua ek'ari at'ári p'anapata perã. ²⁶ Jõdee Abraham wëra jara k'inia bi it'aripema Jerusalén. Tachi Cristode ijãapataarã it'aripema Jerusalendepemaarã. Maperã p'anadak'aa ma Sinaí eede jarada jua ek'ari. ²⁷ Tachi Ak'õre pedee jarapari Isaíapa ichiaba jaraji ma Jerusalén omeede, chonaarãweda nǎgí pedee p'āk'ári:

‘Pi, chi warra t'ok'aa bita, o-ĩa báji. O-íapa bíaji warra t'oru p'ua senti-e bi mïda mǎik'aapa pi k'imapa pi yiaraa iru bi pijida. Na ewari pídeepa uchiadait'eerã chok'araara pait'ee chi warra naa t'odadeepa uchiadait'eerã k'ãyaara.’ *(Is 54.1)*

²⁸ Ípemaarã, tachi Abraham warra Isaack'a. Tachi chi naa warra t'ok'aa badadeepa uchiadak'a p'ani, wãara ijãapata perã Tachi Ak'õrepa jara bide, Abrahampa ijãadak'a. ²⁹ K'irãpáti chi

warra naapema Agarde t'oda eperã jĩp'aak'a t'oji. Jõdee chi warra t'êe t'oda Sarapa t'oji Tachi Ak'õre Jaurepa t'opidak'a. Mãga baji mĩda, chi naapiara t'oda, Ismaelpa, nepĩra jiriji Isaac, chi t'êe t'oda ome. Írã mãga pik'a Moisepa p'ãdade oo k'inia p'anĩrãpa nepĩra jiripata tachi Cristode ijãapataarã ome. ³⁰ Mamĩda mãga baji mĩda Agar warra ome, Tachi Ak'õre Ũraa p'ãdade jara bi:

‘Áyaa pẽipáde aji, ma esclava ichi warra ome. Ma warrapa chi ak'õrepa bẽida ata-e pait'ee chi wẽra warrapa ataparik'a.’ (Gn 21.10)

³¹ Mãpai ĩpemaarã, Tachi Ak'õrepa tachi jẽre-e pait'ee. Tachi Cristode ijãapataarã chi esclavadeepa uchiadap'edaarãk'a-e. Jĩp'a chi esclava-e badadeepa uchiadap'edaarãk'api p'ani. Mapa tachiata Tachi Ak'õre truadee wãdait'ee.

5

Cristodeerã Moisepa p'ãda jua ek'ari p'anadak'aa

¹ Cristopa mǎgá tachi uchĩa atada perã Tachi Ak'õre Ũraa Moisemaa p'ãpida jua ek'ariipa, chóoti irude ijãa p'anide. T'ĩunáati ma ũraa p'ãdade jara bi jua ek'ari, waya esclavoorãk'a p'anadait'ee.

² ĩŨriti mi, Pablopa jara bi! Parãpa pãchi k'ap'iade tauchaa bĩpiruta pirã, k'ĩsia p'anadairã mãga oo p'anipa it'aa wãdai, Cristopa parã waa k'aripa-e pait'ee it'aa wãdamerã. ³ Ichiaba waya jarait'ee. Parãpa pãchi k'ap'iade tauchaa bĩpiruta pirã, t'ĩudait'ee jõmaweda Tachi Ak'õre Ũraa p'ãdade jara bi jua ek'ari. Mãga ooruta pirã, oodaipia bi jõma ma ũraade jara bik'a, Tachi Ak'õrepa

parã pia ak'imerã. ⁴ Parã, ma ũraade jara bik'a oo p'aniãrã Tachi Ak'õrepa parã pia ak'imerã, Cristode ijãa amaadaruta mãik'aapa waa ichideerã p'anada-e pait'ee. ⁵ Mamĩda tachi Cristode ijãapataarãpa ijãa p'ani Cristopa tachia p'ek'au k'achia oopata wẽpapipari, Tachi Ak'õre Jaurepa tachimaa mãga k'awapipari perã. Maperãpi ni p'ani p'ek'au k'achia wẽe p'anadait'ee Tachi Ak'õre k'ĩrapite iru ewari waibia ewate. ⁶ Mãgã ni p'ani k'awa p'anadairã Tachi Ak'õrepa tauchaa iru beerã apemaarã k'ãyaara pipiara ak'i-e. Ma awara pipiara ak'i-e tauchaa bipida-eerã. Jĩp'a pipiara ak'ipari eperã awaraarã k'inia iru bĩpa, Jesucristode ijãapari perã.

⁷ Naaweda parãpa mãga ijãa p'anajida. ¿K'aipa ma wãara ijãa amaapijima, Cristopa oopi bi awara oo p'aneedamerã? ⁸ ;Tachi Ak'õrepa-e paji! Iruata parã jiriji ichideerã p'aneedamerã. ⁹ Levadura ma-ãriipa pan masa jõmaweda waridaiparida apata. ¹⁰ Mamĩda mia ijãa bi parãpa mi ũraa ũridait'ee mãik'aapa ooda-e pait'ee seewa jarateepari apidaapa oopi k'inia bik'a. Mãga ijãa bi Tachi Waibia Cristo mãgeerã k'ãyaara mãik'aapa jõmaarã k'ãyaara waibiara bapari perã. Ichi k'aurepata tachi ijãapataarã araa p'anapata. Jõdee mãgeerãpa jarateepata k'aurepa Tachi Ak'õrepa ãchi k'achia ooit'ee.

¹¹ Ipemaarã, ¿mãgee jarateepataarãpa jarada-e p'anik'ã mia auk'a jarateepari eperãarãpa ãchi k'ap'iade tauchaa bipidaipia bi, Tachi Ak'õre ũraa p'ãdade jara bik'a? Wãara Cristode ijãai naaweda, mia mãga jarateepachi. Mamĩda at'ãri mãga jarateeda paara, ãchia mi ichiak'au

bik'ajida, aupedeeda-ee. Mamĩda mǎga ooda-e p'ani. Ũridaamaa p'ani mia jarateek'āri Cristo kurasode piuda, ma k'aurepapai tachi it'aa wā dai.
¹² ¿Ārapa k'ĩsia p'ani-ek'ā Tachi Ak'õrepa piara ak'ipari chi k'ap'ia t'ĩpidap'edaarā? ĩMǎgara, āchi k'āratau paara t'iap'epidaipia bi!

Cristode ijǎapataarā chik'inia p'anapataadaipia bi

¹³ ĩpemaarā, k'irāpāti Tachi Ak'õrepa parā ĩiriji p'anapataadamerā Cristo jua ek'ari, ma chonaarāweda ũraa p'ādade jara bi jua ek'ari p'anapataadai k'āyaara. Mamĩda k'ĩsiadaik'araa bi oodait'ee pāchi p'ek'au k'achia ooyaa bi k'ap'iaapa oopi k'inia bik'a. ĩĩp'a k'ĩsiadaipia bi awaraarā k'inia iru p'anadait'ee mǎik'aapa k'aripadait'ee. ¹⁴ Nǎgĩ ũraa jara bik'a ooruta ĩirā, Tachi Ak'õre Ũraa chonaarāweda p'ādade jara bi ĩõmaweda oodait'ee: 'Awaraarā k'inia iru bapariĩji pichi k'ap'ia k'inia iru baparik'a.' (Lv 19.18)

¹⁵ Ma k'āyaara, awaraarā k'ĩra unuamaa iru p'anaruta ĩirā mǎik'aapa nepira ĩiriruta ĩirā āra ome chõodarutamaa, ĩõpidait'ee Cristopa oomaa bi parā t'āide mǎik'aapa waa t'āri auk'a p'anada-e pait'ee.

Oodaipia bi Tachi Ak'õre Jaurepa oopi bik'a

¹⁶ Maperā oo wāk'āti wāti Tachi Ak'õre Jaurepa oopi bik'a. Mǎga ooruta ĩirā, ooda-e pait'ee parā p'ek'au k'achia ooyaa bi k'ap'iaapa oopi bik'a. ¹⁷ Oodak'āri tachi p'ek'au k'achia ooyaa bi k'ap'iaapa oopi bik'a, p'oyaa ooda-e Tachi Ak'õre Jaurepa oopi k'inia bik'a. ĩõdee oodak'āri Tachi

Ak'õre Jaurepa oopi bik'a, ooda-e pait'ee ne-inaa tachia oo k'iniata. Omee weda auk'a p'oyaa oodak'aa. Mapa parãpa oodaipia bi Tachi Ak'õre Jaurepa oopi bik'a, pãchia oo k'iniata oopiamapa.

¹⁸ Mãga ooruta pirã, p'anada-e pait'ee Tachi Ak'õrepa Moisemaa ùraa p'ãpida jua ek'ari. Ma k'ãyaara Ak'õre Jaurepata oopiit'ee Tachi Ak'õrepa oopi bik'a.

¹⁹ Jõmaarãpa k'awa p'ani eperãarãpa oodak'ãri ãchi p'ek'au k'achia ooyaa bi k'ap'iaapa oopi bik'a, nãga p'anapata: miak'ãi p'anĩrã awaraarã ome k'ãipata; k'ĩsiapata chĩara ome k'achia oodait'ee; awaraarã jiripata ãchi ome k'achia oodait'ee; ²⁰ ne-inaa juapa ooda k'ĩrapite it'aa t'ĩpata; petau tau k'awaa beerãmaa wa jaipanaarãmaa wãpata chĩara k'achia oodamerã; awaraarã k'ĩra unuamaa iru p'anapata; nepĩra jiripata chĩara ome; awaraarã net'aa ata k'inia p'anapata ãchi-it'ee; k'ĩrauyaa p'anapata; jõma k'inia p'ani ãchi-it'ee aupai; t'ãri auk'a bidak'aa awaraarã ome; k'ĩsia awarapipata eperãarãmaa ãyaa ateedait'ee awaraarã ik'aawaapa; ²¹ awaraarã net'aa k'inia p'anapata maa-e pirã ãchik'a pa k'inia p'anapata, ãchimaa ne-inaa k'achia oo k'iniadarutamaa; chĩara peepata; it'ua toyaa p'anapata; pariatua nek'oyaa, toyaa, k'achia oodait'ee jiriyaa p'anapata fiestade; mãga bee. Mia naaweda jaradak'a waya jarait'ee. K'ĩrak'aupai mãgã p'anadai. Mãgee ne-inaa oopataarã p'oyaa wãda-e Tachi Ak'õre truadee.

²² Jõdee chi oopataarãpa Tachi Ak'õre Jaurepa oopi bik'a nãga p'anapata: awaraarã k'inia iru p'anapata; t'ãri o-ĩa p'anapata; k'ãiwee p'anapata

awaraarã ome; k'ĩrau-ee choopata awaraarã ome, nepirade p'ani mĩda; awaraarã chupiria k'awaapata; t'ãri pia p'anapata awaraarã ome mĩik'aapa awaraarã k'ũradak'aa; jĩp'a oopata ãchia jara p'anik'a; ²³ audua nipadak'aa; ne-inaa pariatua oo k'iniadak'ãri, mĩga oodak'aa. Ũraa wẽ-e jarait'ee mĩgee ne-inaa oonaadamerã, pia p'anadairã. ²⁴ Ma et'ewa jara aupadade k'ĩsiadak'ãri, k'awa p'ani Jesucristode ijãapataarãpa oo amaapata ãchi p'ek'au k'achia ooyaa bi k'ap'iaipa ne-inaa k'achia k'ĩra t'ãdoo oopata. ²⁵ Tachi Ak'õre Jaurepa tachi Cristode ijãapataarã k'aripapari perã, ichita oodãma irua oopi k'inia bik'a. Mĩgã wãara pia p'anapataadait'ee Tachi Ak'õre k'ĩrapite.

²⁶ Tachi k'inia nãga p'ananaadãma: audua; pedee-idaa; nepira jiriyaa; chĩara k'ĩra unuamaa ne-inaa iru bi k'aurepa.

6

Chik'aripa p'anapatãati

¹ Ipemaarã, mĩa ichiaba nãga ũraait'ee. Parãdepema k'achiade baairu pĩrã, parã chi oopataarãpa Tachi Ak'õre Jaurepa oopi bik'a, t'ãri pia mĩgĩ k'aripadaipia bi ma k'achia oo amaamerã. Mamĩda k'ĩrak'aupai parãpa ne-inaa k'achia oodai, iru k'aripa p'ani misa. ² Chik'aripa p'anapatãati. Mĩgã jõmaweda choodait'ee nepirade baaidak'ãri. Mĩgã chik'aripa p'anadak'ãri, oopata Cristopa oopi bik'a.

³ Ijãaparipa k'ĩsia bi pĩrã ichi pipiara bi awaraarã k'ãyaara, ichi itu k'ũraru, jõmaweda auk'a p'anadairã

Tachi Ak'õre k'ĩrapite. ⁴ Ijãapari chaa k'ĩsiaipia bi ichia ooparide. Pia oo bi pirã, t'ãride o-ĩa baipia bi. Mamĩda awaraarãpa oopata ak'ik'araa bi k'awaaitee auk'a pia wa mak'iaara pia-e bi ichia oo bi jĩak'a. Tachia oo p'anidepai k'ĩsiadaipia bi. ⁵ Mia mĩaga jara bi tachi chaachaa panadait'ee perã Tachi Ak'õre k'ĩrapite, irua tachia ne-inaa oodap'edaa ak'imerã.

⁶ Ijãapataarã jarateepari it'aideepa parãpa ũridak'ãri Cristopa ooda eperãarã k'aripait'ee, ma jarateepari pia ak'i p'anadaipia bi mĩik'aapa ne-inaa pia teedaipia bi irumaa, iru mimia pari.

⁷ K'ũranáati pãchi itu. Tachi Ak'õre oo iru p'anadaik'araa bi. Ne-uuparipa ne-uuk'ãri, ma ne-uuda jĩak'a ewait'ee. ⁸ Mĩaga pik'a k'achia k'ĩra t'ãdoo ooparipa ichia k'iniata oop'eda, ma k'achia jĩak'a atait'ee, atuait'ee perã. Jõdee Tachi Ak'õre Jaurepa oopi bik'a ooparipa ne-inaa pia oop'eda, ma jĩak'a atait'ee, it'aa wãit'ee perã. ⁹ Maperã sēnaadama ne-inaa pia oo p'ani misa. Mĩgá choo p'ani pirã, na ewari atadait'ee jōmweda Tachi Ak'õrepa iru bi ichideerã-it'ee. ¹⁰ Maperã tachi na p'ek'au eujãde p'ani misa, eperãarã jōmweda k'aripadama. Mamĩda naapiara tachi ipemaarã Cristo k'aurepa k'aripadaipia bi.

Pablopa ũraada mĩik'aapa salude tee pēida

¹¹ Ak'iti mia nĩgĩ letra waibiapa p'ãru michi juadoopa. ¹² Ma tauchaa bipi k'inia p'aniĩrãpa parã k'ap'iade mĩaga oopi k'inia p'ani judiorãpa achi pia ak'idamerã. Jara p'ani judio-eerãpa mĩaga ooruta pirã Tachi Ak'õre Ũraa chonaarãweda p'ãdade jara bik'a, pia p'anadai judiorã k'ĩrapite. Mamĩda wãara

māga oopi p'ani judiorā waidoopa. K'iniada-e judiorāpa āchi jiridamerā miapidait'ee, Cristodepai ijāapata perā. ¹³ Ārapa paara ne-inaa jōma ooda-e Tachi Ak'ōre Ūraa chonaarāweda p'ādade jara bik'a, āchi k'ap'iade tauchaa iru p'ani mīda. Māga bita, ¿at'āri parāmaa tauchaa bipi k'inia p'ani-ek'ā? Māgá awaraarāmaa audua jaradai āchiata parā k'ap'iade tauchaa bipidap'edaa. ¹⁴ Taawa mia maarepida māga oo-e pai. Jīp'a mia nāgí audua pedee jarai: Tachi Waibia Jesucristo kurusode piuda k'aurepapai mi it'aa wāit'ee. Ma k'aurepata ĩrá maarepida mia p'ua-e bi na p'ek'au eujādepema ne-inaa tachia oo k'iniata k'īra t'ādoo. Māgee ne-inaa piu pik'a bi mi-it'ee. Jōdee na p'ek'au eujādepema ne-inaa oo k'inia p'aniirā-it'ee mi piu pik'a bi, māgee ne-inaa waa oo k'inia-e bairā. ¹⁵ Ma awara Tachi Ak'ōre-it'ee p'ua-e bi tachia tauchaa iru p'ani tachi k'ap'iade wa wēe p'ani. Jīp'a irua k'inia bi Cristode ijāadamerā, māgá eperā chiwidi pik'a padaidamerā, araa p'anapata perā Cristo ome. ¹⁶ Mapa mia parāmaa ūraapari ijāapataadamerā Cristodepai. Mi it'aa t'īpari Tachi Ak'ōremaa irua parā chupiria k'awaamerā māik'aapa k'āiwee p'anapimerā jōmaweda nāgí ūraa jara bik'a oopataarā, wāara ichideerā perā.

¹⁷ Māpai na pedeepapai na k'art'a p'ā aupait'ee. Waa apidaapa mi ome nepira jiridaik'araa bi. Mi k'ap'iade jidik'ada-idaa unurutapa k'awaadai mia oopari Jesucristopa oopi bik'a.

¹⁸ Īpemaarā, mia it'aa iidi bi Tachi Waibia Jesucristomaa irua parā pia ak'i bapariimerā, parā t'āride bi misa. ¡Amén!

Tachi ak'õre pedee
New Testament in Epena (CO:sja:Epena)

copyright © 2005 Wycliffe Bible Translators, Inc.

Language: Epena

Translation by: Wycliffe Bible Translators, Inc.

Epena

sja

Colombia

Copyright Information

© 2005, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Epena

© 2005, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-23

PDF generated using Haiola and XeLaTeX on 11 Nov 2022 from source files dated 29 Jan 2022

1e08d4cb-71aa-5440-b08f-b522fabb6441